

հայութիւնը իր ինքնավար դպրոցները պահպանութեան համար ծախսելիս է եղել տարեկան գրեթէ մէկ միլիոն ռուբլի: Եւ մի՛ մոռնաք, որ ինչպէս դպրոցները թիւը, այնպէս նաեւ նրանց ելեւմուտքը տարուէ տարի զգալապէս մեծանում էր:

Նոյն 1914 թուականին ռուս-պետական ժողովրդական դպրոցներում սովորող հայ աշակերտութեան թիւը աւելի եւս մեծ է եղել — 43,594, իսկ միջնակարգներում՝ հինգ անգամ աւելի, քան հայ-ազգային միջնակարգ վարժարաններում: Եւ ռուսական այդ դպրոցները հանդիսանում էին մի-մի ձուլարան՝ լուծել-տարրալուծելու համար հայ (եւ տեղացի միւս) տարրը: Եւ սակայն ազգային գիտակցութիւնը այնչափ զօրեղացել էր Ռուսիոյ ժողովուրդները մէջ ղեռ ցարիզմի օրով, որ վերջինիս Պետական Դուման հարկադրուած եղաւ՝ առաջին հերթին ղէթ տարրական դպրոցի առաջին տարիների ուսմունքը ազգայնացնելու մասին օրէնք ընդհանրել:

Փետրուարեան յեղափոխութեան հետեւանքով Կովկասի ռուս-պետական դպրոցները ազգայնացուեցան, տարրականները միանգամից, միջնակարգները՝ աստիճանաբար, շարունակելով հանդերձ պահպանուել պետական միջոցներով: Այդ ընթացքը զարգացաւ եւ իր տրամաբանական վախճանին հասաւ՝ անկախ հանրապետութեանց ստեղծումով:

Այսչափը՝ դպրոցների մասին: Բայց չէ՞ որ, գիտենք, մշակութային իմֆնավարութիւն ասելով հասկանում ենք նաեւ ազգային գրականութեան, արուեստի, թատրոնի, գիտութեանց մշակումն եւ պահպանութիւն՝ սեփական ուժերով, բայց պետական միջոցներով: Արդ, կարելի՞ է ասել, թէ, օրինակ, Վրաստանի եւ Ատրեջանի հայութիւնը, իր թուական համեմատութեամբ, պետականօրէն օժտուած է՝ հոգալու իր այդ կարգի պէտքերը: Թիֆլիսում, օրինակ, հայ եւ վրացի տարրերը թուով մօտաւորապէս իրար հաւասար են: Արդ, իրար էլ հաւասար են հայկական եւ վրացական դպրոցները այդ քաղաքում: Հաւասար չափով են հայերէն եւ վրացերէն ներկայացումներ տրուում Թիֆլիսի թատրոններում, որոնց կառուցման մէջ հայե-

րը յամենայն դէպս անհամեմատ աւելի բաժին ունին, քան՝ վրացիք: Յատկապէս Թիֆլիսի — ոչ ամբողջ Վրաստանի — գիտական եւ ուրիշ կարգի մշակութային կարիքների համար յատկացուած դումարներից հաւասար չափով են օգտուում քաղաքի հայ եւ վրացի տարրերը: Հարկաւ ո՛չ: Զէ՞ որ Վրաստանի համայնավար կուսակցութեան պետը, Կախիանին ինքն էր, որ դեռ վերջերս հարկադրուեցաւ խոստովանել, թէ, օրինակ, Ախալքալաքի հայութեան մշակութային եւ տնտեսական կարիքների համար անհամեմատ աւելի քիչ միջոցներ են տրամադրուում, քան՝ որեւէ ուրիշ դաւառի: Գիտէ՞ք ինչու. որովհետեւ... Ախալքալաքի բնակչութիւնը շարունակական գիմումներով է խանդարում «բարեխնամ կառավարութեան» հանդիստը:

Ո՞ւր է մնում հապա մշակութային ինքնավարութիւնը Խորհրդային դրախտում: Ինքնավարութիւնը մէկ կողմը: Թիֆլիսի հայ բանուորը նոյն քաղաքի վրացի բանուորի չափ քաղաքացիական-մարդկային իրաւունքներ վայելո՞ւմ է: Ո՛չ:

Քուէի իրաւունք ունեցող Խորհրդային քաղաքացիների թիւը Թիֆլիսի հայերի մէջ պակաս չէ, քան վրացիների. այդ յայտնի է: Իսկ ի՞նչ համեմատութեամբ են ներկայացուած այնտեղ հայ եւ վրացի իրաւահաւասար ընդհանրեցումները:

Ոչ այլ ոք քան «նոյն ինքն» Օրթոնիկի՝ ձէն էր, որ մի քանի տարի առաջ թուական տուեալներով հրապարակ հանեց — հարկաւ ակամայից — երկինք աղաղակող խորականութիւնը՝ մի կողմից վրացի, միւս կողմից հայ եւ ուրիշ ազգի «քաղաքացիները» իրաւանց մէջ: Եւ Օրթոնիկիձէն զրանով ուզում էր մի փոքր նստեցնել իր «աջակողմեան» — որպէս թէ ինքը ձախակողմեան է — համայնավար վրացի ընկերների ազգայնական փուքը, թէ՛ տեղիք, ստեղծուած (սեփական ձեռքերով) պայմաններում ո՞րչափ արտօնեալ վիճակ ունին Թիֆլիսի վրացիք, հանդէպ միւսների, էլ ինչի՞ են դեռ զժգոհում: Ինչո՞ւ չէ, աւելին համայնավարների փորն էլ չի ծակել:

Ի՞նչ էին ասում Օրթոնիկիձէի թուերը (1926 թ. համար). —